

執齋先生文集

第叁冊

執齋先生文集卷四

萬安劉玉著

五言律詩

晚泊家君命賦

客棹晚初停人家夜未扃雲收沙上月風撼水中星遠近
相呼鴈高低自照螢聞詩慚面壁獨喜慰趨庭

重過漂程山莊

重到山莊下如今又幾年江移沙擁套林換筍抽鞭犬吠
門初啓鷄烹酒共傳兒童似相識相語各依然

江行初霽

頓息風濤險應憐行路難江添昨夜雨雲露別州山柔槽
伊啞發輕帆雜還憑將異鄉事一寄故園間

孤鴻

旅鴈皆南去孤鴻更北飛所憂群侶失寧惜稻梁微帶雨
聲偏急穿雲影獨迷相期二三月還作一行歸

出塞

首二句得之夢中

千金裝寶劍結束報君恩一笑辭鄉里群歌出塞門軍鋒
猶未接虜氣已全吞試看麒麟閣何人第一勲

二

鼙鼓震天聲羶裘已暗驚六韜神變化八陣衍縱橫突騎

陰山折揮旗瀚海清虜酋潛乞命繫組受降城

三

將軍拂寶刀壯士未辭勞駝馬千群入羗胡萬里迓晝閑
旗影躡夜寂凱聲高却笑燕然石文章浪自褒

旅宿有懷

驟雨失更籌虛簷滴未休客眠孤館夜人隔五湖秋螢影
踈相趁蛩聲密自酬無端池草夢依約大刀頭

武姥仙祠

武姥亘南極仙祠結構牢鐘聲秋漢閣幡影暮雲高申甫
攀鱗翼由夷惜羽毛浪傳塵世外鸞鶴夜遊遨

梁洲牧散

驅犢上梁洲春芻處處幽
噬殘風掠野飲罷雨添流
放遠隨飛鳥歸遲起宿鷗
南山歌未已還有甯生不

芭田耕樂

百畝移邠地三春入舜天
隴翻黃犢外陂漲紫鳩前
扶老依林餉提孩趁草眠
還期秋糯熟四海慶豐年

桑迳樵歸

腰斧趨歸程青山半入城
雲隨兩屨穩風入一肩輕
觀奕惟塵迹携書亦世情
擬同垂釣叟川上話無名

早朝

漏徹千門啓鑾鳴萬馬通
火城連曙色馳道擁塵蹤
際世羲軒盛掄材海嶽同
獨慚天祿閣未肯效揚雄

月

素魄騰滄海清光蕩碧霄
坐看幽戶滿思入故鄉
遙露砌虫聲續風枝鶴夢搖
何人凌倒影晦雨亦今宵

戊午元日示諸生

輝縣作

五始麟經正三元鳳曆更
乾坤吾道泰日月此心明
酒賀春無恙詩占歲有成
拔茅連茹客期爾共登瀛

春謁百泉書院

在輝縣

幽境枕山扃泉源瞰小亭
懷仙空往跡仰聖得餘馨
野媚

風回綠沙融雪漲青太平春有象塵目醉偏醒

雨晴偶述

塗潦連朝雨公衙近夕暉稍忻塵慮減翻覺道心微淺碧
休賒醉陳紅未療饑宦遊雖落落無愧故山薇

自笑

自笑共城令迂狂死不休壯心晨舞劍幽興夜登樓愚智
兼千慮公私更百憂誰能蘇仲子祇惜敝貂裘

回隆驛

牽路遶村斜舟行聽早鴉負囊趨遠渡提甕立平沙日出
雲生葉風回浪起花大行天際碧吾亦憶吾家

代東張伯淳

近日難循吏吾儕易俗儒掄才兼措刻鼓譽藉苞苴腰豈
淵明傲心猶漫叟迂訊詩張尉氏吾道定何如

憫雨

輝縣作下同

朝雨不成澤暮雲空復陰望穿農父眼愁破使君心粟貴
如炊玉泉枯似刮金傳霖何日夢耶復禱桑林

喜雨

薄暮雲陰合侵晨雨勢連天心消旱沴地力釀豐年庭漲
珠盤走簷鳴玉珮懸使君忘考績一笑吏民前

石門

在輝縣

重岡登木杪幽廟俯潭陰琴筑含風遠
檐帷隱霧深屢游千里目偶會百年心
寄謝山靈道商巖已傳霖

三湖寺

在輝縣

漸入中湖境流泉清我心路盤青嶂曲
寺隱碧源深香飯開芝隴齋厨採竹林
北湖應更僻鐘磬隔危岑

又

也愛南湖好幽禪又一關崖欹林擁路
源峻水登山殿壁龜文剝爐香鳥篆殘
仙蹤重回首塵駕又空還

勝福寺次韻

地出平羅遠山連勝福幽佛香雲磴細
僧飯石田收經梵

千林晚幡幢萬壑秋幾時逢慧遠一笑
虎溪頭

冒雪

洒洒更霏霏皚皚遠近迷隨風初半樹
着凍已平溪路入齏田隱天連粉嶂低
詩脾清似淪疑是灞橋西

雪霽

雪霽萬山澄山行興愈增日華爭皎潔
風力助嚴凝狹徑深藏石平溪淺露冰
不知茅屋底高卧幾人能

夜至林縣

冒雪晨趨檄披星夜解裝逢迎踈候吏
偃息借公堂榻冷知風勁爐銷覺漏長
空懷戴安道剡曲興微茫

歸途

曉晴回玉勒歸路擁瓊花紫霧蒸山氣清輝蕩日華削波
冰掛壁髡樹凍凝槎勞役何須問窮生更可嗟

夜至侯趙川

公事晚初停公亭夜未扃薄田憂積稅破屋計窮丁高樹
風翻雨遙山火露星何人猶版築幽夢入丹青

得歸

時奄瑾目以黨人罷官

遠道傳通報他鄉喜放歸行藏關世運消息任天機秋近
尊經滑春餘筭箭肥麻斜吾舊隱隨處着柴扉

江行

雲去淮山立風來海岸搖帆飛千里月船壓半江潮鼓枻
懷前哲乘桴耻 聖朝夜深搔短髻天籟聽寥寥

謾興

甕綠初篘酒園紅欲放花杖藜從稚子欵步過隣家閑可
畱人坐貧將向客誇不知何甲子隨意度年華

又

洗竹通山逕封雲護石田浩歌天地外浪迹古今前東郭
時雙屐南華日幾篇任教軒冕客瀛海覓神仙

訪隱

桃源懷舊隱藜杖過前村山逕多逢雨巖扉半入雲種花

皆結子馴鹿自成群賓主無名姓高談到夕曛

出儀真阻風

詔獄放還

晚泊黃泥港風濤眼豁開不辭淹信宿渾覺謝塵埃岸葦
翩翩去沙鷗一一回鍾山真有意飛翠過江來

題扇寓懷

時以御史起用

杖策出林臯囊書萬里遙霜蹄爭地迥雲翮喜天高耕鑿
甘吾老弓旌荷 聖朝擬分洙泗水霖雨化春郊

古墳

古墓臨官道繁華慨昔人妖狐穿隙地枯木領殘春百歲
身如電千年骨未塵幾時華表鶴來訪石麒麟

偃師晨講遇雨

晨講集中裾天瓢溢太虛庭階將泛玉簷瓦似跳珠枯稿
重生後郊原一洗餘爲霖期爾輩莫訝是隨車

過郊縣留題二蘇墓祠蓋楊方伯名甫所脩而六
一墓近在新鄭甚荒落因致意云

慶曆生材盛眉山衍慶長追趨近韓孟指顧失曾王墜地
真龍種凌霄亦鴈行雉膏祠下土草木尚餘香

又

列嶂環嵩麓平川帶汝涯新祠下里市古墓大方家開創
已無極封培如有加尚憐歐六一鈞北混桑麻

題畫

吾愛春山好吟懷亂入雲板橋楊柳岸茅屋杏花村瘦蹇
寧勞策流鶯似可聞輞川兼杜曲此意若爲分

又

嵐影酣秋樹波光灩晚汀偶逢維棹客同上望湖亭漁網
忻於物村醅詫寧馨滄浪歌一再吾興已沉冥

昌平次馮司寇僧房夜坐

駕至南都下同

新城鄰寢廟古刹駐行旌雲歛金烏影風停鐵馬聲河山
千古勝弓劍萬方情永夜愁無寐空懷諫議名

又

天宇湛冰壺星河澹欲無蛩聲四壁靜松影一庭孤清茗
斟還酌華衾疊更鋪明裡心有在遙聽六陵烏

長至歸途再次前韻

嘉辰回使節野望引心旌遠店鷄聞唱窮邊鴈寄聲書雲
尋往事捧日係深情元化方更始幾微未可名

又

旅次倒銀壺陽生一線無塵消天宇淨野曠日輪孤古渡
水微泮窮簷草亂鋪閉關存大易歸欲語童烏

維舟獨坐

地僻愁無到心虛理自還秋聲踈獨樹暮景澹遙山迹寄

從遠外名拋寵辱間
夜燈無底事書卷未能閑
送 駕至清江浦次韻白巖

九伐殊方靖三驅凱奏還
民心自流水國勢本丘山
濫迹操竿後低眉執戟間
行宮近江海時見白鷗閑

京口別後寄憲

吳棹乘秋霽江帆濟曉寒
老經離別慣病覺去留難
帝闕吾懷報親闈爾問安
春鴻聽消息重對淚痕乾

宿房村下

歷歷數長亭舟行晚未停
歸雲衣疊嶂落鴈字寒汀
古渡稀聞棹孤村遠見燈
壯懷慚旅泊禁漏憶晨興

嘉靖新正試筆

北極輕雲斂東華麗日開
衣冠三殿集玉帛萬方來
暖入春前柳寒餘雪後梅
共將歡拈意一奉慶成杯

寒

冬令催年駛風威助雪號
饕凍顏疑宿酒瘦骨凜新刀
獵騎慵朝秣隣鷄噤夜號
故人多范叔誰與贈綈袍

次韻鄭大里芍藥

藥闌春事好肯放酒杯殘
欲赴韓公約空聞杜老看
玉盤新拭露寶珞更凝丹
曾是花前客詩盟未可寒

又

舊譜傳素父新交得子期亭臺如有待觴詠豈容私絕艷
塵難染清香俗未知莫疑春節過猶有欲開枝

聖主方圖治蹇君又謫官臨岐無盡意把酒不成歡得喪
庸兒計行藏後代看蒼梧明月夜應復憶長安

遊甕山次韻

遊子紆歸路禪關訪早春山明花已放湖暗柳初勻芳茗
消詩困清歌助酒神夜窓空有約禁漏憶侵晨

幽興

石逕稀塵迹柴門盡日關叩槃歌應谷歌枕夢窺山潭靜

遊魚躍林虛宿鳥還倦遊甘自棄復此得希顏

元日趨朝口號

元日際時雍千官覲九重拜稽旌影下歡抃樂聲中凍雪
融春煖零雲釀歲豐拔茅欣道泰吾與萬方同

舟中夜雨

客枕三秋雨官河五夜航夢回初浙瀝起立更蒼茫白首
懷鄉邑丹心繫廟廊塞鴻亦何事衝冷入瀟湘

漂母祠

每向淮陰泊常懷漂母名古祠殘照裏芳草歲華更智鑒
同推食仁施異頡羨千金亦何有聊復薦香粳

聞甘肅有驚寄榕溪公

驛吏傳邊報羗戎犯肅州極知兵士苦誰解
聖明憂調集晨分竈供輸夜唱籌早期青海靖定遠舊封侯

祖陵

鬱鬱盤龍地千秋王氣函盱眙山拱北汴泗水流南祖德
公劉並神功帝禹參餘恩沾草木奕葉忝朝簪

大同兵變

掌股雲中戍潢池血又殷乾坤真曲貸梟獍故深頑謾擬
邊城築翻勞內帑頒懸書購元惡仗鉞亦何顏

寄魯伯姪索畫

聞道丹青手吳生故絕倫湖山翰浩蕩花柳得逡巡招隱
疑仙境尋芳擬後塵更煩觴詠罷揮灑發天真

早春曉望

高棟凌春靄踈簾捲朔風樹迷秦苑迥花引武陵通筋力
衰年後登臨勝槩中江山故無盡後樂許誰同

廢宅

往事不可問頽垣空復過親朋流水盡丘壠夕陽多鳥散
鄰歌舞花殘路綺羅靈光終寂寞郿塢欲如何

雪霽安德道中

雪晴驅曉傳一白遍山東氣肅風停後輝連霧靄中茅簷

仍宿凍麥隴漸春融縞帶銀杯句吾慚賦未工

寒甚

積雪增風力蒸雲淡月華河橫冰磊砢路倚樹槎牙絮折
裘難覓壺疑酒漫賒不知高卧處温飽幾人家

嶧山

鄒嶧跨青徐玲瓏萬仞餘乾坤聳樓觀川陸遶舟輿古篆
留秦刻枯桐紀夏書羨渠巖下寺雙鶴每凌虛

滕縣

過客懷滕子停車問井田舊疆無百里遺廟有千年山遠
明寒雪林深暗晚烟淵源鄒魯接俯仰思悠然

利國監驛

利國詢遺俗殘碑倚夕陰河山分帶礪徐克合喉襟爐冶
功雖廢疆場計亦深建官陪末議經此倍沉吟

贈別

慷慨辭家易交親對酒難驪歌雙淚落衣袂幾時乾共惜
南荒遠翻思北地寒隨陽有歸鴈日可報平安

題五雲樓

城起五雲鄉樓高面夕陽遙闌增水勢入幕露山光占地
民居勝朝天驛路長煩君嚴鎖鑰容我貯壺觴

方思道至

亭館閱春暉占星願久遠烹茶聞雀語沽酒得魚歸道委
千鈞重功垂一綫微老懷殊耿耿金玉借餘輝

林茂貞至

仙舟經敝里隣雀報吾聞喜下南州榻愁空北海樽睽違
雙鬢改遲暮此心存更僕情難罄伊顏舊所論

送人上京

惜別駐行舟長歌激暮流壯心爭劔戟世業詫弓裘客路
七千里皇都百二州濟時吾道在莫羨取封侯

大雨

隱隱送雷車沉沉通海涯溜簷排玉柱激地散銀花隴畝

關心切江湖入望賒桔槔空倚壁高枕聽鳴蛙

暴漲

鐵豕渡銀河臨階詠涉波入春晴日少滿地落花多客倦
頻支竹僮閑旋緝蓑東湖隔西崦柰爾小舟何

仙境

仙境出塵寰漁舟繫淺灣春晴花欲放日暮鳥知還逕轉
疑無地林深更有山菴源應不遠犬吠白雲間

油嶺幽居因見晚燒乘興賦此

誅茅油嶺下人世隔丹青逕僻秋風掃田腴野火燒虛窓
納雲霧踈檻掛猿猱欲更移家遠疑防木客巢

試燈遇雨弟姪小酌

晚晴初見月微雨又連朝恐負燒燈約能忘折柬邀釘梨
經臘凍釀黍及春朝節物關吾意餘醺復日誼

問陳宗禹

落落曉星稀故人歸未歸危機與直突幽夢隨園扉談虎
心常怯屠龍計總非天涯重回首含淚不成揮

試筆

香糯沸春槽蔬盤愧老饕林藏三徑僻山獻五雲高佳境
耽松翠清時嗇雉膏吾衰忘著述咕畢信兒曹

春泛

溪雨漲輕航乘春覓醉鄉岸隨鷗陣過山入樹陰藏自酌
知深淺同謳信短長興闌思返棹載月未渠央

秋興

老子秋逾健卑棲天所安吟因停筆坐飲亦把書看秀采
陶園菊香貽屈畹蘭登高應不遠杖策恐行難

夜坐

別館徂良夜絳絃味苦腹風泉吟斷續雲月字模糊莎砌
虫聲聚松簷鶴夢孤駒駒吾自得高榻異團蒲

小樓

小樓升木杪老境最相宜得句天邊遠觀山枕上竒塵蹤

謝來往新釀得扶持太乙雖難致吾仙未可知

世降

六籍逮狂秦三王跡已陳虞淵初息駕滄海又揚塵猿鶴
皆君子豺狼有故人祇存丹竅理常與日華新

幽居

竹色開軒處荷花獨坐時遙山連莽蒼微日動漣漪往事
忽如寤故交空復期濁醪諧世態覆瓿有吾知

五言排律

贈曷戶部

昭代稱多士如公更絕倫文章擬班馬問學陋楊荀夏出

才無匹兼全善有鄰良金須躍冶駿步必超塵聲價前賢
重風流後輩親菁莪深化育黃甲迅飛跟斗爲當時仰麟
因瑞世振地官初列職郎署獨留神出納存經國征科計
右民 聖情懷遠運詔旨畀能臣行李扁舟上皇華潁水
濱令嚴遙震嶽心恕近藏春吏畏逢劉晏群歡得馬伸千
艘來雜遝萬斛聚逡巡國賦丘陵積皇圖日月新成功真
不忝峻陟豈無因指日登台輔明時贊化鈞一令群物阜
再使四方淳自愧泥塗賤常懷壠畝貧力微功莫展勢屈
志難信棄馬思歸晏登龍喜拜陳玉英飛晝雨金鑑耿秋
旻茅啓會中塞途開足下屯風雲生短翮波浪躍窮鱗今

古皆吾道乾坤只此身囑君爲藥籠容我備參苓

奉憲副俞公二十四韻

衆木趨東海群山拱岱宗自慚非遠志却擬附冥鴻
鬢亂懷書冊晨昏就學宮靜窺千古上傲睨萬人中
志大功難就才踈命亦窮棲棲嗟屈蠖瑣瑣愧雕虫
臺閣欽前列門墻拜下風光芒金出冶卓犖劔磨鋒
腹笥乾坤富文機錦繡工名科初變豹仕路久乘駘
稍展澄清志仍攄啓沃忠九重深簡命貳臬更稱雄
地挾江湖迥霜飛瘴癘空豺狼應絕迹神鬼亦潛踪
笑領經時畧閒分琢句功才優名不忝學積道方隆
坤勢仍高下譙光亘始終三台虛位久四

海望心顯寡昧真何似高明獨見容道傍憐病馬門下許
登龍更諾文章重寧論禮數豐春光温着面秋氣浩填膏
滾滾流將達我我勢益崇未能成德業何以謝遭逢

稍坑山居留題同褒弟

一逕虎溪頭稍坑境頗優木杠緣石渡竹筧接田流天近
千峰合雲深萬樹稠野禽喧更寂林卉艷還幽古寺人誰
到閑居客自投畝畝分歷覽樽俎共淹留夜愜姜肱卧晨
貪杜甫遊桃源遺俗遠漁父莫相求

賀新婚

瑞靄接藍橋仙輶降紫霄巫雲凝弱質湘竹挺新標
奠鴈

簾櫳啓乘龍劍珮遙洞房停白晝斗帳貯清宵醉態揮銀
燭羞容護薄綃露含芳萼歛風引碧枝搖比翼原相倚同
心可待要盟山山匪石誓海海能朝百歲歡常捧三生福
已徼宜家應教國歛衽賦雍天

自張秋泛河書事

洪河春雨積浩渺若憑空鞭石終難濟乘槎詎可窮津涯
雲影外原隰浪聲中鷹隼愁飛度魚龍喜渾同屋留蛙產
竈人逐蟻移封麥隴沉新穗桑林沒舊叢民生深可憫國
計若爲供汴地今全折淮流昔已通蒼茫懷禹跡寥落詠
豳風卹緯非吾事哀歌訴九重

次韻答李宗一年兄

高唱初聞穎清辭曩出埃交情空爾厚離抱若爲開委積
關民隱咨詢得使才路從河畔轉身向日邊來御苑花先
發山城草始芟登科應浪爾作縣且優哉計欲綬南畝情
猶繫上台勸耕源水曲招隱韭山隈彫弊真難拯迂踈豈
易裁束書躬簿領謝客對輿臺邈矣黃廬隔悠然剡棹回
春吟殊未就夜漏莫相催

贈王如行年兄廣東憲長

憲府壓南溟天恩拱北宸激揚關至理遴選得良臣奕
葉青緇重連枝紫綬新科名聯甲乙政譽起逡巡霜皎刑

曹曙風煦群邸春叅藩才愈展廉臬寵斯頻韶舞薰殊俗
刀耕洽細民汀潮通舶棹梧桂淨烟塵遠惜都門別深期
殿陛親暫將憂國意一訊嶺雲濱

贈仇總兵

海宇暗風塵龍符昇虎臣將韜名已舊侯爵寵猶新列校
兼煩牧元戎協甫申金戈揮日馭鐵騎匝雲屯烈烈先聲
振堂堂大義伸民心安艱軌士氣起逡巡鏖戰雷轟石窮
追電走燐山東收黑闥關外靖黃巾狐兔千群殪桑麻萬
國昫羽書傳禁苑笳吹過梁闐鼓舞紛倪耄歌謠動縉紳
論功陋前史麟閣倚勾陳

贈金正郎

郎署才華盛皇華使節新軍儲資餽運國計籍忠純內帑
恩雖重中州力已貧飛芻來迤邐積粟致逡巡超距三軍
勇騰嘶萬馬駢清風傳羽檄餘澤靜烟塵淮海鯨方剪巴
山鹿未馴願言恢上策寰宇望經綸

總制鄧公賀捷

朝紱重儒紳公才曩絕倫股肱先感激肝膽獨披陳曩者
權奸縱因而寇盜頻中丞持使節外省布皇仁師出真無
敵兵行若有神嵩行風掩草河洛雨清塵九代功彌著三
驅意更真危林安弱羽涸轍濟窮鱗凱奏聞京國風謠動

縉紳持衡虛位久司寇拜恩新許國心恒赤憂時鬢已銀
周詩邦屏翰堯典帝臣隣德望過裴郭神明協甫申鴻敷
昭百世寧羨畫麒麟

題南山歲寒圖

竒巖削雲屏媧皇詭巨靈中庭堆紫翠半壁掛丹青名擬
群山圍文擲衆皴形騫騰巖地鑰峻極造天扃佳植根相
托隆冬雪累經葉葩分旖旎柯節倚娉婷秀色聯三島沉
光浸八溟深藏仙子洞高映老人星相府徵嘉慶賓筵萃
德馨仰瞻詩再詠欵合酒全醒箕衍民同福周傳帝錫齡
祝公仁且壽歡頌溢林垆

送王金溪南臺都憲

逸驥來西極潛鯤起北溟家聲騰梓里宦業藹楓廷虎榜
先收雋牛刀漸發硯亭亭刑署月歷歷憲軺星敷政三吳
悅宣威百粵庭小屯安杖几大蹇耻壘瓶列缺驅忠誼撓
槍掃穢腥力扶神禹鼎功紀太常銘葑菲寧堪采芝蘭故
自馨艱難思共濟熙皞喜重丁牽復初聯珮超遷復駕舲
兩都分壯觀八座切高旻揚激張風紀遊觀暢性靈全明
期晚節麟閣炳丹青

壽張敬亭都憲

仁者原多壽投簪靜益安兩疏爭俊逸二老謝盤桓得失

臨棋悟升沉倚畫看有詩來枕上無夢到朝端樽泛三春
釀遙開百歲權桂香風靡靡菊秀露溥溥仙筭南山輩朋
情北海寬尚餘承慶客雲路接高翰

壽喬白巖太宰

崧嶽生申日維翰瑞已昭弱齡徵遠器筮仕挺英標文雅
承三世勲庸際四朝道宜資密勿德可鎮浮囂出甫干戈
戢歸仍鼎鼐調銓衡綱庶理宮保冠群僚優渥留薰殿餘
懽寄午橋壽逢春未晚善積慶芳暹花甲添新筭蘭叢長
舊苗海濱均受祉黃髮樂耕樵

壽楊遂翁

間氣鍾人瑞稀年壯國華真才天所縱禧錫世同嘉釋齒
窺中秘蒼顏起後車猷爲兼將相聲教迄幽遐彥士紛推
轂偏裨半樹牙風高躋傳傳春滿鄴侯家觸事聊揮羽憂
時髮岸紗幸臨恩獨至存問禮逾加北固航三島中冷釀
九霞鶴南歌一曲仙筭海無涯

同蔣子修百泉次韻

愛此蘇門好幽亭絕點埃興緣詩句得懷向酒樽開月窟
探玄理龍章惜異才昔賢嗟已往我輩喜重來瑞雪資泉
脉光風撥草芟湧金誠美矣環翠亦奇哉日訝山連斗情
憐地勝台沙空鷗性愜波迥鳥飛猜笙度危林杪舟移曲

岸隈短章應易綴幽思故難裁掃壁觀遺刻臨風憶舊臺
屢登魚撥刺不記馬虺隤暝色千山至春容二月回賞心
渾未已無柰簡書催

起廢示諸友

北極綸恩渙西臺剡薦通一麾忘宿譴三楫慕遐蹤抗志
烟霞表容光日月中故應圖後報不是假先容聖遠綱常
在民殊化育同吾孱托群彥協力挽鴻濛

樂城趨瀛海道中書事

驛路曲城西驅馳思欲迷河分舟屢喚橋沒馬頻嘶崩岸
留冰骨淤沙長雪肌亭荒數株柳村遠一聲鷄拾藁難爲
暖熬鹽豈療飢慚予非撫字嗟此亦蒸黎畿縣毋嫌小農
時未可稽幽風歌峻喜作意播春犁

留題麻溪別墅

逕轉精廬出維深與靜宜晨光供典籍春意借畝畝山入
踈櫺小泉通曲圳遲林高旆紅酌籬密幔青絲美景若川
盡幽懷錦里詩巢由莫相笑擊壤共兒嬉

雪梅

二瑞應三冬滕華炫廋叢灑枝初浙瀝粘萼漸玲瓏冷焰
疑相逼清肌訝許同深藏珠磊落淺布玉籠鬆影重明欺
月香微密透風郢中寧獨唱隴上定重逢宜共椒花釀難

將桂炷烘曉來春意動仙露濕芳叢

執齋先生文集卷四

執齋先生文集卷五
七言律詩

峽江龍母祠

龍母豢龍龍已飛龍祠江上有遺基蕭侯香火分新社揭
子文章失舊碑水落波濤終自怒山空烟霧尚堪疑少年
頗有乘風興幾度維舟酌酒卮

贈安南貢使

萬國提封總帝家安南誰道隔天涯金函舊錫周王履玉
節頻浮漢客槎山盡鯨波知雨露星回鰲極記年華諸君
奉使承優渥驛路馳驅莫憚賒

素扇馮宗師出韻見試

閭闔歸來兩袖風人間渾覺暑塵空
霓裳對舞雲邊女霜律雙吹月下童
剡水綠烟清淪玉渭濱蒼雪巧雕蟲
欲知酷吏今何去盡在斯民解愠中

乘風

積雨秋江散曉晴朔風吹送片帆輕
紛紛綠剡隨流水冉冉青山入故程
霄漢却觀飛隼退波濤深恐卧龍驚
由來快意多生忽且置清樽待月明

望夫石

望望征夫久未回風風雨雨苦相催
江邊一夜身為石塞

外千年骨始灰嵐影壘雲秋不斷
水聲咽月夜還來誰家翁仲遙相望
衛霍墳頭盡草萊

秦娥廟

秦娥祠廟晚停驂往事猶傳漢晉間
鶴駕一歸蓬島迥鴉聲常占對陰閑
雲拖山色明窻牖水挾溪聲響珮環
聞道仙壇留絕頂臨風翹首怯躋攀

寄孺子亭

拔劍樽前浩浩歌壯懷如此欲如何
馬卿病起踈慵甚賈傳窮居感慨多
擾擾豺狼當鳥道紛紛鴻鴈罹魚羅
君行孺子亭前過憑寄愁心向薜蘿

求文西昌歸舟有感時彭孺人殯倉背園
晚風衝雨理歸航百感驚心憶北堂身後江山新宅兆手
中針線故衣裳浮生無定浮雲計流恨不窮流水長寂寂
羅團洲上路難禁一望一回腸

暴漲

章江咆吼漲群龍一水瀰漫遠近空百畝生涯泥濘裏萬
家消息雨聲中客來深巷乘槎入人住危簷架木通欲寫
窮愁嘲海若春雲漠漠暮潮東

塞上

狼心烽火入邊樓上将遙分 聖主憂古戍角聲衝月起
交河旗影帶冰流軍前殺氣三秋淨塞上妖氛一夜收應
笑書生誦姬孔要將甘雨洒青丘

登青雲樓家君命賦

一上高樓宇宙寬青雲渺縹接簷端書聲徹夜星辰動筆
陣凌秋風雨寒簾外波光浮活水窓前秀色隱晴嵐蓬萊
此去無多地綵鳳新添舊羽翰

江垆

江垆烟景易黃昏野火漁燈遠近分紅葉已藏林外寺白
雲猶露雨邊村孤舟順水雙鳴櫓小店依山獨閉門坐久
不知清露重蘆花洲上月紛紛

寄咸肅兄

江頭日日候歸船
南北東西路幾千
旅館夢回常徹夜
故鄉書去動經年
愁連郢對雲初合
思入湘潭月又圓
莫道少年堪久別
高堂華鬢亦蕭然

秋興和杜

征婦知秋欲獻功
呶啞機杼寂寥中
秋聲不斷虫和雨
寒色無邊鴈帶風
曉鏡自窺雙鬢綠
夜窗相對一燈紅
烽塵未靖歸難定
廟筭須煩魏弱翁

昭君村和杜

幾多艷質閉長門
獨向天涯吊此村
羅綺香消宮月冷
琵琶

聲斷塞雲昏
湘江東下傾遺恨
巫峽西來鎖斷魂
若向胡沙覓青塚
離離荒草更堪論

值雨

山店經過逢急雨
柴門繫馬久徘徊
溪流決石穿橋過
簷溜翻階入座來
苦竹叢深泥似積
黃茅岡遠路如埋
斜陽只在浮雲裏
憑仗東風一捲開

五陂

幽境無塵獨自來
尚嫌屐齒破蒼苔
層層對隔山深淺
曲曲溪隨路往回
野鳥引雛驚復下
春雲含雨暝還開
石門竹澗堪同賞
欲賦慚非謝運才

粵王臺

章遂江流去不回江邊今有粵王臺年深往事憑誰問春
盡野花空自開落日每隨孤鳥沒好風時送片帆來登臨
却喜青山在猶勝阿房化劫灰

山行

踏踏松陰散馬蹄重岡過却更沿溪野芳躑躅疑攢綺山
翠空濛欲染衣雙渡屢迷春雨後孤村猶在夕陽西行人
莫信豺狼橫腰下吳鈎帶雪飛

黃鶴樓

崔顥題詩樓上頭樓前日日繫扁舟白雲未散登臨後黃
鶴猶疑汗漫遊山去蘄黃青冉冉水來湘漢碧悠悠一樽
且盡憑高興莫問鄉關與帝州

又

層樓迥出城闈上勝迹常留天宇間招手可通神禹廟欸
肩不礙大軍山石崖磨沒詩猶在塵世消沉鶴未還擬問
亭中吹簫客暮帆過盡對陰閑

題梅

我家池上歲寒枝管領春光蝶未知夜雪壓香風細細曉
霜鋪影月離離調羹未羨清酸味傾國須憐雅淡姿莫向
林逋吟寂寞廣平詞賦擅當時

登樓

獨倚書樓望帝京，雲霄有路骨難輕。
早早事業非吾輩，滾滾功名愧後生。
積水長天隨鴈影，晚涼高樹送蟬聲。
酒酣更拂吳鉤看，豪氣凌風耿未平。

中秋

秋色平分月正圓，海風吹上碧雲端。
沉沉影度銀潢濕，湛湛光搖玉宇寒。
親畔不辭今夜醉，客中曾是去年看。
東西南北陰晴共，常約嫦娥奉此歡。

哭內

鏡破鸞飛錦帳空，還家千里夢相逢。
十年舊事蒼波外，一夜新愁白髮中。
長擬桑榆同暮景，忍看蘭桂泣秋風。
柔嘉頗有生前行，誰勒曹碑馬鬣封。

寫恨

暝色無端上綺櫳，玉銷香散漏聲中。
劈開苦蕙青房破，掣斷長絲素藕空。
鴛枕夜寒愁不寐，鳳樓天遠夢難通。
冰弦欲整還惆悵，起步庭階嗅落紅。

又

卧聽丁東響佩環，起看雲剎擁青鬟。
遠疑風馭三山外，近隔星橋一水間。
春院引雛黃鳥鬧，晴簷呼友紫鳩閑。
鏡鸞舞罷無消息，惟有清輝照苦顏。

落花

春盡名園仙路遙，盡辭芳對入晴霄。
綵雲有影因風起，絳雪無聲向日颺。
玉珮留情終易散，香囊遺恨竟難招。
瑤池謾說三千歲，願遣青鸞探寂寥。

西湖

湖上長吟憶蕩陰，英雄遺恨古猶今。
六朝總被淮山隔，三戶其如湘水深。
精衛有冤終赴海，杜鵑無血可投林。
皇威此日清沙漠，應慰平生敵愾心。

梅窻兄所

醉後不知春夜短，醒來偏覺雨聲長。
簷端急溜疑翻瓦，窻外高風欲撼床。
往事盡成千日夢，新愁還入九回腸。
寂寥二館空回首，惟見流雲入渺茫。

雨望攄懷

獨坐書齋，殿雨聲登高望遠。
愴懷生行藏未定，身如寄憂患無端。
夢亦驚幾處碧山芳草，合誰家紅檻落花平一編。
坐展風簷外，賴此鳶魚獨有情。

午日思親

去年今日阻山川，今日今年隔九泉。
離別尚期親歲歲，死生寧論路千千。
愁聞角黍拋江水，哭捧蒲觴酌几筵。
里閭未知春不相，古祠簫鼓競龍船。

雨後餞顛令

餞客高堂夜正遙
回風度雨下層霄
爾翻窓葉侵人語
忽濺簷花入酒瓢
玉峽漲添波渺渺
金臺塵洗路迢迢
此行須稱爲霖意
嶺北蒼生望已焦

題墨梅

月暗孤山路渺漫
夜深誰轉換形丹
春藏鳳味花開易
色染龍涎樹老難
自信冰霜存舊操
任教塵土變初看
桃枝柳葉雖濃豔
未抵玄姬耐歲寒

寓意

青年不解倚粧樓
十二珠簾下玉鈎
蟬鬢輕盈雲共曉
蛾眉纖細月同秋
懶吟柳絮因風起
羞聽桃花逐水流
七夕又過芳信遠
朱顏猶在莫生愁

歸舟

遠客將歸惜路岐
孤蓬踈雨夢先知
高堂問寢憐鷄早
故里傳書恨鴈遲
急溜遶船時灑灑
長風吹柁故伊伊
何因一借雲帆便
六老祠前泛菊卮

題竹爲雩溪母舅

浩蕩春風入渭潯
此君應是託根深
高標儘爲乾坤展
秀色寧容塵土侵
挺挺嚴秋看玉立
翛翛清夜聽龍吟
有時結就枝頭實
還見翔鸞下綠陰

挽母舅北澗先生

尚憶高人夢奠時，寂寥庭下泣佳兒。
曉風北澗殘花掩，細草西塘暮雨悲。
滾滾功仁餘後澤，恢恢堂構振前規。
執鞭何處空回首，遂水無窮有所思。

贈教弟

江上春寒尚朔風，錦帆斜壓浪花中。
金樽載酒光浮蠟，寶劍橫腰氣吐虹。
年少參戎真得意，清時投筆易成功。
虎城山水如詩畫，摩詰歸時想更工。

輓超兄

懷玉頻年恨未消，脩文一去竟難招。
月窓謾有嘉魚賦，雲路猶存駟馬橋。
忠孝平生真落落，交遊從此亦寥寥。
惟應桂子皆前樹，能送清芬入九霄。

挽袁大尹

五夜郎星暗九天，秋風旅襯載歸船。
飛鳧一去知何處，化鶴重來是幾年。
落落聲名青簡上，悠悠寔夢白楊邊。
萍鄉剩有棠陰在，楚夢歌殘淚泫然。

卓兄偕計上京口號

綵衣舞罷五雲城，更着藍袍上玉京。
萬里長風隨遠棹，九天初日動危旌。
臨岐不盡家鄉念，對酒其如感慨情。
男子由來志孤矢，但將忠孝答皇明。

哭孚兄

卧聞君病不勝憂，忽報于今事已休。
落葉自分千古恨，看花誰共百年遊。
柔腸貯火傷尤劇，弱淚成江怨未收。
深夜有靈應聽否，清歌一闋萬重愁。

登樓

危樓風雨隔塵寰，黃卷幽清白晝閑。
宇宙欲窺寥廓外，江山疑在有無間。
一窓霽月吟當戶，兩袖清風步遶闌。
不是元龍渾占却，時人誰解一躋攀。

元日自徐入京

河流水雪穿洪去，路輾瓊瑤入沛來。
戲馬無人豪氣盡，登龍有客壯懷開。
故園梅蕊傳春信，旅店椒花送曉杯。
忽憶前脩增慷慨，高原忠骨莢顏瓌。

春日至京是日有事南郊

春日驅馳及帝郊，園丘星綵麗層霄。
周廬夜宿千官擁，鹵簿晨歸萬馬驕。
太液冲融冰欲泮，上林葱蒨雪初消。
趨朝幸際明良盛，佇聽賡歌入舜韶。

趨朝東汪器之

雙闕鍾鳴催曙色，五門人跡沸春濤。
衣冠影向彤墀靜，環珮聲隨玉陛高。
堯德遠追千古盛，禹躬真與萬方勞。
小臣欲效宵衣頌，慚愧詞林有鳳毛。

瓊林宴

光祿分庖出禁城春官堂上宴群英衣冠濟濟瓊龍盛絃
管雖雖雅頌聲仙露染將花壓鬢和風薰得酒生頰微臣
奕世沾優渥感激惟知頌太平

贈周駕部閱馬入奏南歸爲董壽甫賦

郎署聲華動瓊閣多才江右似君稀秋風按節驂騮集春
雨隨車首藉肥湛露北來偏浩蕩縉雲南去更光輝傳經
高第今盧植獨向都門惜解携

銀海浪仙

瀛海當年作遠遊銀山萬疊擁危舟龍光直射黃金節蜃
氣橫連白玉樓醉裏雙眸吞弱水吟餘孤興靜浮漚歸來
懶作軒裳夢卧看西江日夜流

神京

萬國梯航拱帝京五雲樓閣麗春晴
恒問不盡參天色灤衛長流入海聲
玉塞洗戈聞凱奏金臺鼓篋見群英
班生謾擬東都賦毛穎其如日月明

寄題褒弟隱居

麻斜溪上幽居好朝市紅塵意盡降
泉隙自鳴蒼玉珮樹陰誰擁碧油幢
抱琴客過雲生逕歌枕詩成月到窗
更意年年秋糯熟伊吾聲裏倒銀缸

西山次韻

西山晴皴碧生粼爽氣朝來爲洗塵雲卧石潭龍欲醒露
巢珠樹鶴常馴平郊未覺驅車遠幽逕能忘載酒頻秀色
皇都堪攬結題詩應許謫仙人

又

日射嵐光接海涯望中樓閣是天家丹梯倒擁懸崖樹青
壁分流出洞花塵外笙歌聞細細雲端衣袂落斜斜蓬萊
便欲乘風去七椀須傾諫議茶

感事

尋真初擬飯胡麻咫尺藍橋路轉賒響屨乍傳鸚鵡喚曲

闌將度海棠遮心懸瑤島三春信目斷銀潢八月槎寄謝
紫霄青玉鑑爲誰孤影照窻紗

贈王年兄宣齋兵器便道歸蜀

皇華歌罷駟駢駢錦里如今是畫歸照匣龍蛇秋水卧
筇鷹隼絲雲飛星河夜動支機石天路春隨戲綵衣歡罷
庭闈試翹首故人環珮滿黃扉

駕幸南郊東李貽教

禁漏稀微徹九重南郊馳道接行宮翠華雲動天容霽丹
轂春回地脉融萬姓歡呼瞻繡袞六軍騰踏擁飛龍賈生
謾有蒼生對宣室惟君得遠從

駕歸次韻答貽教

拂曙南郊瑞彩重六街清蹕候還宮旌旗影接金莖麗鼓
吹聲調玉燭融融踏天閑歸虎豹雍雍仙仗集夔龍自慚
染翰詩先就未抵揮毫句更工

求將

暮雨秋風郭隗臺黃金山積等浮埃虎頭但負食肉相俵
臂何須飲羽材塞上甲鳴誰慷慨窗前劍舞獨徘徊夜占
龍氣瞻牛斗恐有干將徹底埋

哭廷弟

幾度書來折寸心死生消息尚浮沉他鄉易冷姜肱被遠

道難調子敬琴落落鴈行悲夜永蕭蕭荆樹怯秋深何因
更作池塘夢風雨撩人思不禁

又

故里書來未忍書逢人強勉問何如墳笮已付他生外原
隰空懷萬里餘稚子有知應解哭寡妻多怨定難祛死生
契闊無窮淚偏向清宵洒客裾

長安春興

東風城柳鬱蒼蒼暖入宮花錦繡香紫氣成龍雙闕迥紅
塵隨馬六街長盤觴競客春無際珠翠留人夜未央忽憶
堯風增感慨西山南去是平陽

赴輝道中

天園平野雪凝沙渺渺孤村趁宿鴉
衰柳數株聊繫馬夕陽千里正思家
仲舒已恨逢君晚長孺其如去國賒
桃李上林春自好且將功業付柴麻

泥溝

泥溝車駕聽啼鷄燈火將停思轉迷
曙色漸呈山遠近月華猶影樹高低
寒生古道來人少風振鳴鑿去馬齊
辛苦自朝還自解此心原不愧栖栖

至輝經迤里有感

數家迤盡一村孤隱隱頽垣沒斷蕪
荒迳不堪人獨立寒林空對鳥相呼
已無里社耕遺地猶有文書索負租
明燭君心天萬里短才何以爲民蘇

汴藩文場

檢閱初停晚思沉塵埃不到棘圍深
一庭霽月揚秋影千里長風掃夕陰
豪傑未醒千古夢行藏難寫百年心
好分伊洛源頭水散與皇家作傅霖

朝覲歸途

玉京新別日華東歸路隨陽背塞鴻
淺碧漸回源上雨軟黃輕裊水邊風
平沙獨石扁舟繫茅屋柴門小市通
欲買一樽澆磊砢不堪回首向疲癯

閑憇

路轉河灣倦客征柳陰閑坐午風清老翁沙上行相顧稚
子堤邊睡不驚潁水也知三聘重商岩那惜一毫輕寸絲
穎粟公家計屈指歸舟尚幾程

三仙祠

在輝縣

三仙祠廟石門間一水回還出兩山帳暖曉雲生暮暮珮
寒春雨響珊珊碧潭魚躍龍猶卧丹竈鴉啼鶴未還惟有
乞靈祈稔客年年牲帛此躋攀

憫旱

沿城一望一沉吟愁折春陵漫叟心茅屋破來風更捲麥
畦荒盡雨如金乘林夙昔疑湯旱莘野于今愧傳霖雲漢
欲歌天漠漠餘民如此恐難禁

檢荒蘇門次韻蔣子脩

百門幽逕透陂陀千里遙山倒碧波榴火不嫌疎雨潤柳
絲偏愛好風多窮簷久歷知民隱廢隴新翻擬歲和獨喜
咨詢陪使節甘棠應許後人歌

登十八盤次前韻

石逕盤盤轉碧陀遙嵐滴滴染晴波雲開鳥背清風遠雨
過林端爽氣多谷戰有人憐武穆巖棲無路訪公和臨高
不盡長安望肯聽南山叩角歌

入中湖次韻

石磴千層樹萬行群峰迴合蔽晴光僧居自擬出塵遠客
至渾忘入谷長靈石簷楣分野色名花庭砌異春陽何時
桂玉臨高頂一展雙眉隘八荒

夜坐方丈次韻

上方人靜夜鍾鳴境爽空山倍月明泉迸石間通雨氣竹
連松外遞風聲味傳蔬笋停杯久思染烟霞得句清為語
山靈知姓字後來誰此繼高情

金章里

輝縣

金章西去少人家望接蒼生覺路賒春盡原頭無綠草晚
來谷口足黃沙唐風落落民猶儉禹迹茫茫賦自奢借問
催科陽令尹欲將何地富萊麻

雲門送石二尹允運

幾度漕河送遠行此行樽酒喜頻傾微微瑞雪添春水藹
藹卿雲作晚晴民隱也知邦計重賢勞渾覺旅懷輕陽城
劉晏宜中道努力清時贊治平

壯遊

越北燕南幾壯遊只今蹤跡遍中州地吞河洛千尋雨天
展嵩行一抔秋世黍牛羊眠廢壘年豐禾黍上荒丘匆匆
懶效梁園賦擬向新豐覓馬周

醉中次白沙韻

復向樽前浩浩歌行藏天亦柰吾何時來莘野皆霖雨
去蟠溪即釣簑萬古典謨終日月片時盟誓自山河微酣
一枕希夷夢絕勝人間計較多

二

堂堂歲月雙蓬髮納納乾坤七尺身植杖也非孤往客
啜還有獨醒人高情幾許難攄寫幽夢無端且欠伸寄語
巢由莫相笑長官原不為憂貧

三

忽聽秋風過鴈哀閑呼明月坐蒼苔盈盈綠酒不辭飲
滾滾紅塵空復來屠釣幾曾窮呂望簞瓢原自樂顏回仰天
一笑心先醉何必蘇門問嘯臺

四

好隱吾非五柳家公庭聊復岸烏紗翠巖欲飲風前木紫
艷渾開雨後花數尺溪樓堪摘月一壺村釀即流霞太平
要共康衢樂仕路寧論驥與蛙

過濟登大垓山次韻子脩

黃河曾遶濟南山禹跡常留天地間綠樹舊攤雲氣潤丹
崖新刻雨痕斑自憐覽勝人初到誰許尋幽客未還忽向
樽前懷拯溺巖樓輸與老僧閑

次韻酬郭魯瞻

浮丘山與百門山聲迹相望百里間君許我才龍腹那我
知君相虎頭班交情難向賓筵展高韻渾追古意還為語
樽前風月道栢臺能許使君閑

午憇靜樂僧房在汴城西

炎埃偏倦客途長亭午留驂靜樂房宿雨一簾花氣潤清
風四揭樹陰涼蔬盤旋掇凝酥滑茗碗初傾帶雪香不究
旛風心自寂閑呼竹枕付繩床

桃源圖次李晦之韻

莽莽天機周復秦山中寧識晉君臣生嫌流水終歸海約
束桃花別放春興廢我關千古慮仙凡人訝百年身武陵
太守空多事咫尺柴桑好問津

齋所次壁間鶯湖舊韻東石潭仲和器之

掃壁開軒續舊詩塵蹤慚我十年違微風入座爐薰鼻獨
樹臨堦日影移學海此生心未已登瀛何許夢相隨賈生
久擬承宣室共積精禋替受釐

井陘淮陰侯祠次韻

執戟當年厭薄遊登壇曾此展良籌草山遠望龍驤隱派
水窮追鼠穴憂東向威儀收衆策北臨冠蓋動諸侯可憐
神去空祠廟惟有寒泉咽細流

又
家翁誰復作，聾癡齊楚分。封計已危莫道多，多能爾辨寧。
知快快正渠，疑固陵一代河山壯。淮水千秋草樹悲，何事
幕中多策士。曾無半語到鷓夷。

又謝承次韻李少叅東王伯安

少年才譽已無雙，豪氣今隨萬里航。醉裏江山賓從減，閑
中風月簡編忙。祝融南去蠻烟黑，僭耳東連海色蒼。從此
遐方添故事，新詩宜寫寓公堂。

又中堂又事又八米無汝問事

半生歧路將班白，千古功名幾汗青。薄宦漫隨勾漏令，奇
文休擬太玄經。江花的皜聊供玩，野鳥啁啾已慣聽。定有
朔風隨爽氣，披襟一笑酒全醒。

唐山道中

勞役何因一破顏，恒山迤邐望唐山。塵消九陌微風後，春
在雙陂細雨間。稚子走隨黃犢健，白鷗飛對老翁閑。咨詢
有奏關民隱，遙憶金鑿綴玉班。

登獲鹿城

獲鹿城頭曉振衣，千林秋色萬山圍。黃花雨後垂垂發，白
鴈霜前故故飛。屈指重陽三日近，驚心群從十年違。異鄉
縱有茱萸酒，誰共登高眺落暉。

燈花寄諸弟

珠蕊金葩構火精
絳紗和霧護輕盈
津津浮潤能蒸菌
點點凝芳欲化螢
開處不辭霄月妬
落時偏忌曉風驚
江生夢筆成何濟
羸取餘香付墨卿

漳川得家訊

路轉京華萬里餘
故鄉時見隔年書
親闈南北頻回首
使節東西幾定居
恒嶽忽瞻峒嶺月
章河空憶小潭魚
袖中久有陳情疏
何日還家賦板輿

謾興

雨過西山得意青
緣陽溪上水初生
深深犬吠不知處
緩緩鳥啼如有情
提甕小娃難借問
扶筇老父解逢迎
花間酒旆遙相引
定有新筵許客傾

二

曉呼童子駕牛車
閑訪城東隱士家
兩岸好山初過雨
一溪新水淨無沙
竹窓旋掃陳陳葉
石鼎徐烹細細茶
讀罷黃庭揮綠綺
更須何地覓胡麻

三

縛茅爲屋倚山椒
名姓人傳太古樵
白石曉炊雲出甌
清泉夜釀月生瓢
釣魚懶過雙溪堰
驅犢時臨獨木橋
寄謝長官休物色
多年洗耳向唐堯

黃山道中

山行迤邐覺身輕絕頂清秋雙眼明千里林巒分遠近四
郊雲日變陰晴閑花自笑知何事野鳥相呼似有情謾說
椒源堪避世不堪回首愧蒼生

被建北行寄諸昆友

懷報才疎負夙心朔風縲紲路難禁崑岡有火應焚石勾
漏無沙可鍊金涕泣不堪親愛重保全終賴 聖恩深題
詩遠寄連枝友社燕歸時聽好音

被建道中

涉江何處望京華渺渺淮雲接海賒殘雪晚風猶客路紅
爐青旆自人家迂疎心事堪誰語憔悴形模祇自嗟回首
故園春漸近小窓應不負梅花

獄中次劉東山先生韻酌任廷贊

宦跡當年耻鷺鳩纖埃何以附崇丘每嗟綺皓山中老真
許龍逢地下遊囹圄即今皆至樂乾坤無地着閑愁知君
懷古多高調曾和康衢擊壤否

獄中聞鳩次韻東葉汝實

園扉清曉聽啼鳩忽憶春光入故丘千古義經慙舊學十
年驄馬負同遊江湖迢遞湘娥怨花柳參差杜甫愁聞道
滄浪堪鼓柁不知鷗鷺定嗔否

嶽中次任廷贊險韻

北窓長擬聽松杉
夢落犧樽愧傳曲
狂調拂雲空自拍
醉筇支月更誰攬
柴門半缺新篁補
藥逕全荒亂葉嵌
寄語東風莫相妬
故園春水候歸帆

二

蕭然園堵坐忘淹
閑看蛛絲網墮苦
歸夢每沿吳水曲
吟懷時趁楚山尖
浮名蝸角吾何羨
直道娥眉衆所嫌
借問龍霄祠下鼓
幾多甘潤到閭閻

三

乾坤何處着茅菴
明月清風共我三
松頂鶴維雲作壑
潭心龍有石爲龕
仙遊久擬追梅福
處士空勞薦李曇
却喜素琴知此意
等閑高坐對清談

贈任廷贊赴遼陽戍

班行夙昔羨觚稜
此地溫顏得委承
朗月清風塵榻曉
高山流水夜窓燈
持身已誓三緘口
歷世寧辭九折肱
明發輪蹄又千里
蓬萊孤絕共誰登

又

莫遣愁思上髮端
朔風聊復試儒冠
八旬親更晨昏遠
十口家應去住難
碣石雲開雙眼碧
扶桑日出寸心丹
平生無限悲歌興
盡付清時管幼安

已巳重九登白雲峯

杖屨從容踏翠鰲五雲深處白雲高芙蓉隔岸浮仙嶠松
檜臨風沸海濤物外笙歌聊一笑人間軒冕謾多勞憑高
欲寄麻姑信爭遣長江化濁醪

登幙頭嶺

紫磴蒼厓鎖翠烟迥臨塵海跨晴川杖藜獨往吾將隱簪
菊能從子亦仙千里帆檣飛鳥外萬家砧杵夕陽邊蓬萊
清淺何須問回首長安思惘然

次韻論學

羲孔心存典籍間濟時功易治身難望窮溟渤真無水行
盡匡廬更有山夜雪門墻藏宿暖春風花柳破餘寒如君
學到忘言處千古淳風一笑還

一舫齋爲王主事乃尊賦

小構軒窓擬畫舟畫將蹤跡付安流優優歲月常如繫浩
浩乾坤正爾浮風遞松聲孤棹發月留花影片帆收濟川
桴海無窮興且放仙翁犯斗牛

湖上阻風訪水仙祠

湖上衝風捲浪花湖邊幽逕似仙家萬山雲霧含春雨千
里帆檣帶晚霞杖策欲侵棲鷓樹披襟閒占浴鷗沙年來
招隱多高興擬拂星河駐釣槎

晚泊

女浦維舟已夕暝一樽懷古思紛紛襟涵彭蠡波心月袖
拂匡廬頂上雲謫去仙人偏解賦時來童子亦能文令人
獨憶南康守千古遺書繼典墳

執齋先生文集卷五

執齋先生文集卷六

七言律詩

壬申五月至共有作

路入共城四望開遶城車馬動春雷師儒共喜先生至父
老爭迎令尹來亭上古碑空歲月壁間新句未塵埃綠筠
難比甘棠樹也是當年手自栽

留題百門山

十年重到百門山華棟依然碧靄間春雨幾回龍化去月
明時送鶴飛還湧金混混天開孔環翠欣欣地駐顏老我
無能資樂育敢同年少學偷閑

又題書院

百泉千古有餘芳濟濟衣冠入講堂邵子別傳周典禮姚
公堪繼漢文章嘯臺天淨鳶魚樂梅圃春融草木香爲語
諸生須領悟濯纓吾欲詠滄浪

陝州

城郭人家擁郡堂小渠流水越重岡中條雲氣連嵩華砥
柱河聲歷夏商老子壇荒餘古檜名公祠在憶其棠義昌
東去皇華路獨倚危闌望帝鄉

澠池道中

韶山一望鬱蒼蒼澗水初分勢漸遙車馬幾回登峻坂耕

桑初喜見平郊會盟臺廢鴉爭粟觀奕巖虛鶴墮樵欲訪
時賢詢往事月川祠廟草瀟瀟

偃師懷古示諸生

邑有伊尹墓伯夷祠

武成功業被當時千古嘉名記偃師歸馬又經伊尹墓倒
戈終愧伯夷祠緱山夜月仙遊遠洛水秋風故國移坐對
諸生歌峻極生才今喜際無爲

自鞏洛趨汴晚至鄭州

行役駸駸晚未休板輿臨澗復經丘疲民稍喜停輪馬遠
戍初聞解佩牛千里斷虹分宿雨一鈎斜月掛新秋稀微
燈火知何處子產城邊乞巧樓

夜坐有懷

世業相承祖子孫累朝何以報深恩詩書道屈伸猶屈忠
孝心存死亦存偶出烟霞依日月忽逢雷雨洗乾坤燈前
有感忠良事掩卷沉思過夜分

謁湯陰岳武穆祠

侍中此地遺忠憤天遣英雄此地生蕩水尚留聲哽咽太
行終與氣崢嶸奸臣萬死羞台鼎黠虜千秋畏甲兵拂曙
古祠停馬拜西湖回首不勝情

秦始皇

密縣有始皇路

豈知天意待歌謳慶盡蒼生血未休霸業將來終楚漢治

功從此不商周長城萬里華夷震馳道千山草木愁誰信
鮑魚風散後阿房離黍不勝秋

赭陽感懷併示諸生

赭陽斜日引行旌瓦礫荒墟得故城亂骨未收冤血染殘
民相倚夢魂驚江山難洗瘡痍恨草木宜知慷慨情秦運
漸回吾道泰勉將忠孝啓諸生

京口登驛樓值雨東林太守廷元

樓檻憑虛積暑清海風吹雨覺寒生潮聲徑觸金山寺雲
氣橫連鉄甕城千古英雄堪灑涕百年樽俎漫留情使君
曾次桑麻地定有歌謠祝太平

題扁舟獨釣圖次泉山老先生韻

落魄江湖一葉舟，釣璫寧羨月為鈎。
雲山隱隱蛟龍夜，風葉蕭蕭鴈鴛秋。
幾欲鳴榔凌弱水，更疑飛觀隔瀛洲。
綠鬟青箬紅塵外，絕勝人間紫綺裘。

觀風長樂書事

閩中冬盡似新秋，翠篠黃花滿道周。
酒市喧喧晨集散，炊烟漠漠晚田收。
山腰疊石通官驛，浦口乘潮進客舟。
惟有里胥征歛苦，寒來踈葛當輕裘。

南壇齋居夜望

齋居清夜遠塵蹤，徙倚危軒一笑同。
西峽江流雲氣外，南臺人語月明中。
龍團滄鼎香仍馥，麈尾揮塵興未窮。
簷鏗定知禋祀意，隔墻時送珮丁東。

次白石山房韻

白石山房碧海邊，盡拋青簡付流年。
輞川圖在無聲外，太乙光垂有象前。
松徑樵童空睥睨，菴汀漁叟任延緣。
道原咫尺鷲飛地，應許醯鷄出甕天。

蘭安書事

清源紫帽兩嵯峨，山下平疇映碧波。
樓觀欲吞閩海盡，旌輶來自晉江多。
青衿濟濟雲邊路，黃犢紛紛雨後蓑。
為語牛刀圖治客，莫愁無地着弦歌。

泉東山行隔溪見仙觀不果入

碧山隱隱見樓臺知有神仙洞府開嵐影溪中流不去花
香林外隔還來紫簫縹緲疑鸞馭丹竈氤氳想鶴胎慚愧
邛郫道上客青駒回首自塵埃

登鼓山次毛先生韻

翠鰲丹鳳冶城東冠蓋追隨躡曉風澗水近輸山雨碧岩
花遙襯島雲紅心懸北極織雲淨目盡南閩萬壑空欲向
群仙問消息窮簷倚日化歌鍾

偶書

醉後樽前舞酒卮此狂無復少年時曾搜今古攤書久思

攬風雲索句逢駿馬長途驚決驟危橋獨木慣矜持丁寧
松桂吾將隱培爾秋來雨露姿

連江東湖祠堂

三今祠堂湖水邊舊詩新頌總堪傳九溪春釀千山雨八
輝秋腴萬頃田松檜故應知往事芷蘋寧復記流年承家
謬忝觀風後欲賦丹青愧鄭虔

東湖道中書事

板輿軋軋勝輪蹄慚愧無功及庶黎雲際山連天上下雨
餘泉迸路東西古墳有主雙松立野寺無僧獨鳥栖却喜
菑畝通遠近綠簑黃犢正堪犁

仙村

路轉俄聞鷄犬聲柴扉開處白雲生簪花稚女有嬌態倚
竹老翁無俗情靈藥雨餘閑自長好峯雲外畫難成沿溪
剩有桑麻地擬卜隣居事耦耕

茶洋驛次陳大叅韻

日上簾鈎卷落鴉驛庭人散似仙家懸崖飛瀑疑聞雨淺
瀨沉江欲見沙燈下豪吟空擊節壁間清句已籠紗夜深
莫作思鄉夢擾擾群生正可嗟

茶洋次韻酬查忠齋

醉筆淋漓舞墨鴉論詩君合大方家窓間籜迸風翻雨門
外舟喧浪捲沙抵掌尚堪揮白羽掀髯聊復岸烏紗明朝
又聽陽關唱珍重金蘭莫浪嗟

曉坐有懷

曉風寒透舊貂裘強對金樽未解愁干羽故應清字甸弓
旌何許貴林丘鴈將踈影來千里菊吐微香傲九秋鵝嶂
龍溪相憶否青藜久已夢書樓

次張大經先生詠留侯

韓相卅心史傳幽謾將三傑擬同遊怒存博浪沙中擊喜
在芒碭氣外浮兵畧早從黃石授朝簪終爲赤松投誰知
辟穀輕身後能使冥鴻去復留

經黃石磯

黃石磯邊野草羞平生奸宄片時休
謾將鷄犬雲中試無復豺狼月下遊
皖水豈能窺鉄甕洪都空自惜金甌
漁翁撫掌嗟竒讖爭似烟波理釣舟

正德己卯寧藩造逆出湖口掩安慶駐于江北詢其地適名黃石磯嘆曰吾謀之十年乃陷于此蓋黃石磯與王失機其音相近故也俄而敗去可謂竒讖矣著之以爲不仁者之戒

余忠宣公祠

裹血膺城憶壯謨古祠停棹醉寒蕪
華夷何地非臣子俯仰惟君是丈夫
卞壺戰殘餘將校張巡死去更妻孥
欲將宋傳鑄巖石彭蠡東來見小孤

崇烈李公祠

長江日夜撼孤城猶似當年戰水兵
千古不消英烈氣百年無忝甲科名
義均余闕知同死才過周瑜耻獨生
幾度扁舟祠下過匡廬烟雨不勝情

駕至江都

紫宸清蹕下丹霄吳楚妖氛已盡消
戎幕謾誇金印重仙家寧羨綺窓遙
雲邊貔虎隨鷓仗水底魚龍識鳳簫
醴酒椎牛臣子事可堪戰伐愧漁樵

京口書事

海上金焦跨渺茫，鑾輿忽送北風航。巡遊愈覺京師遠，供饋其如井邑荒。報國計同秋鬢短，憂時心與夜燈長。此生久被巢由笑，何處人間千仞岡。

候 駕慈僧房至日作

禪館沉沉晝漏稀，感時偏覺壯心違。群黎幾度歌于蕪，多士當年賦采薇。木葉隨風驚世態，梅花凌雪任天機。閉關欲候陽和長，慙愧高岡未振衣。

維揚感興

維揚南北襟喉地，自昔繁華勝益州。木鶴可能醒客夢，瓊花空復憶仙遊。朱欄碧瓦吳山出，錦纜牙樯汴水流。姜李不知填海錄，令人千古恨悠悠。

次韻簡器之約遊鷄鳴山

雨後黃花作意秋，風前征鴈未能休。頗遭白髮催看鏡，稍喜清樽慰倚樓。詩老故應懷杜曲，仙家空自夢羅浮。鷄鳴咫尺不一到，爛却烟霞誰與收。

督師寄勉諸兒

少年直擬學屠龍，此日頭顱漸已翁。瞑眩未能瘳已疾，顛連何以濟時窮。風清露湛天容肅，菊秀松森野趣濃。寄語弓裘窓下客，新涼宜趁及時功。

留題玩華亭奉簡九華君并懷青蓮居士

弭節青陽已見星
曉披雲霧玩華亭
江間半面我頭白
溪上大觀君眼青
一一峯巒真可數
重重紫翠似曾經
謫仙書屋今何在
擬斲松根采茯苓

贈別曾子文

秋風惜別廣陵船
三顧雙溪路幾千
家學足爲科第重
師模肯向利名先
青編獨對時三省
彩筆長揮日幾篇
泰運一新君子進
雲衢着着祖生鞭

京口次韻白巖

鐵城秋望入微茫
萬頃真成一蕩航
瘞鶴銘亡山寺杳
藏

春塢在石田
荒天涯客棹自來去
風外漁歌時短長
擬向群鷗賦招隱
忽聞鳴鳳碧梧岡

高郵次韻留寄白巖

孟城見月已深秋
歸棹匆匆晚未休
林下漸藏元亮逕
驛邊微露仲宣樓
踈燈弄影湖光動
薄袂生寒露氣浮
遙憶仙舟何處所
幾多佳句錦囊收

送咸表弟通判潮州

亦中兩地著其棠
別駕新除向海陽
鱷水東移民俗化
鳳山西聳士風揚
閭閻曉沛三春雨
齋閣秋嚴五夜霜
堯佐昌黎遺俗在
莫辭勤苦佐黃堂

寧藩變後曰卿姪來省告歸賦此

清時驅策厭戎車欣見吾家千里駒風雨笑談浮慮盡江山遊覽壯懷俱離筵又送陽關酒行橐仍携鄴架書孝友世家遺澤遠欲因狂斐賦歸歟

遊報恩寺同白巖追和涯翁詩韻

塔外晴嵐湧翠濤天開圖畫助吟豪笑攀風背雲鵬翻怒拔月心霜兔毫琳宇俯窺僧界靜金陵回望帝城高晚涼又送樽前雨洗盡人間塵土勞

登金山

雨過金山霽色開江心高下見樓臺舟從鶻石巖邊轉人

踏留雲頂上來兀术尚遺亡虜恨允文粗展濟時才只今世泰留都近贏得憑闌對酒盃

又

奇石凌波湧化城只疑鰲背寫丹青埋金地迥消塵土浮玉天空盪日星京業諸山連北固荆揚衆水會中泠欲尋張許題詩處惟有新墓瘞鶴銘

謁陵道中石潭限韻

天際輕陰散曉風昌平遙指太行東林間漠漠炊烟碧花外亭亭酒旆紅遊子芳塵嗟後樂農夫時雨憶先公劉蕡祠廟經過地何限幽情感慨中

又 陵上限韻

天壤精竒莫此山七陵深在五雲間神宮盡日瞻龍馭華
表何年化鶴還雨露恩深芳草合化生功就落花閑於皇
欲效周人頌膚淺須煩大史刪

贈林汝桓次山齋韻

郎曹抗疏陳中悃謫宦飄然向海門今古斯民皆直道乾
坤何地不深恩依依楊柳凌風旆耿耿梅花掛月村莫道
夢槎先有識濟川此意共誰論

泰陵次韻

巍巍功德比丘山十八年餘庇萬間政事脩明時弊革老

成登用古風還衣冠寂寂神宮闕弓劍飄飄輦路閑白髮
侍臣頻拜謁舊詩嗚咽更重刪

康陵次韻

陵前芳草又春風輿馬紛紛驛路東時享謾聞樽泛綠夜
龕惟見燭搖紅輪臺 詔下無遺恨金匱盟存有至公十
載賜環空竊祿不勝惆悵雨聲中

送李宗器司空督理河渠

都臺簡命拜司空霜節星軺下九重河濟舊流非禹迹徐
邳新漲有堯封耕桑半在堤防後疏引全歸漕運中曾魯
未應輕賈讓早收群策奏成功

送成國朱公詣安陸祭告

上公將命致明禋海宇欣瞻 聖孝弘千古丕基尊漢邸
百年佳氣藹春陵星輅到處衣冠集玉冊開時俎豆陳歸
報定知 恩渥重咨詢還看劍章騰

次韻素翁輓黃伯固

旅邸倉皇密問棺秋深轉覺病軀難夢鄉不阻雲山與幻
境真同電露觀新擬詩題誰共賦舊藏書稿忍重看故園
埋正知何處半畝松楸雨露寒

又

漠漠秋空望眼橫清時何地着旃旌囊書謾想垂未化抗
疏寧誇折檻名澤畔更無人獨醒窓前惟有草長生金張
世業夷齊餓千古回看孰重輕

送俞司空江藩冊封

明時恩禮重親親藩邸分封遣近臣玉牒丹書盟已舊紫
泥金檢墨猶新飛雲簾捲廬山曉踏雪詩尋浙水春莫向
江湖耽後樂鵷班仙履聽星辰

送蔡愈憲之蜀

曾見驚濤犯逆鱗攀龍今喜際昌辰安危一息等呼吸舉
措萬幾關咲顰豸服新瞻天闕曉輶車遙指雪山春武侯
祠廟遺碑在吟罷新詩為拂塵

送柱卿姪赴金華同府

九階一轉接亨衢共羨吾家千里駒朱紱明時新冠帶黃
堂清書舊圖書仁風士友供垂榻竹馬兒童款副車聞道
郡中遺俗好白雲門下近何如

贈方思源改威縣令

幾年甲第羨英才杯酒重逢郭隗臺鳧鳥却迴蒼海上牛
刀聊試紫山隈伊顏舊業薰桃李召杜餘功化草萊珍重
政成先奏最太微天近烟三台

送王應時赴襄陽太守

故國文華尚典刑清年儒彥又專城陽春白雪知音在漢

水方山別思輕吾道治民先禮樂明時良吏盡公卿父聞
峴首留芳譽拭目期君政有成

趙錦衣別業醉呈清溪諸公

宿雨初晴見遠山喜陪軒蓋出南關太平有象耕耒樂清
吏無能獄訟閑芳樹雲凝花塢上玉泉春滿稻畦間主人
愛客吾先醉隨意詩成一笑還

阜城冬至

阜城兩度駐征軒臺上書云又一年隴麥尚封晴雪後江
梅應綻曉風前祝禧官舍瞻仙仗拜慶親闈憶壽筵獨喜
閑關培養地微陽生處已森然

東阿即事

恒岳南來望岱宗東阿猶在峪山東林邊古寺臨流見冰
上危橋架木通欲向閭閻詢善政祇應鄒魯尚淳風故交
零落新知遠幾許幽情悵望中

顏瓌墓

顏公沛今廬陵人也建文未死節

社稷安危隻手支綱常輕重此心知未驅玄武門前騎已
拔丹陽鎮上旗千古夷齊真義士百年忠孝有佳兒荒墳
偏洒行人淚泗水東流無盡時

次韻謝馬侍御津

傾蓋相過喜有餘彭城佳勝著方輿栢臺秋色停駘馬芸

砌春香落蠹魚愛日幾回歌樂只披雲時復頌倚歎趨朝
定有蒼生問西署吾慚席久虛

次韻顏梅田對雨有懷

宿雨新晴憶藥欄客窓岑寂夢初闌離離月映三更曉剪
剪風生四月寒報國寸心餘耿介憂時雙鬢半彫殘詩來
伐木愁難和坐對清樽藝紫檀

贈陳侍御謫教海陽

耻隨常調到公卿却喜承恩萬里行臺諫豈論監牧重
師儒尤覺薦賢輕詩兼驛路梅花吐囊有封章海氣清昭
代明揚先樂育棟梁庭下喜諸生

南郊迎駕次韻素翁

六龍騰踏響如琴春入南郊霽色深雲擁翠華風漸軟天
回黃道日初臨濟錫共喜逢時泰淵穆應和協帝心莫道
賡歌千古遠典謨遺迹尚堪尋

重九呈同行諸公

旅泊清源聽晚鴉忽驚佳節又黃花情憐淺渚漁舟繫日
送長空鴈字斜良會喜逢觴玉筵憂時聊復岸烏紗登高
眼底俱能賦莫遣微霜點鬢華

輓王改齊

幾年謫宦憶陳謨詞館初歸志未孚思入故園芳草迥夢

留京邸月明孤人間未必無顏蠟地下還應有董狐歌罷
楚招天漠漠不知何許致生芻

昌平歸途

舉帷拂拂受風吹過却清明尚未知幾樹嫩黃將弄影一
灣澄碧已含姿墻間遠見遊人醉隴上時逢稚子嬉廊廟
山林吾意在故園花鳥莫深疑

涿鹿道中

雲晴遙指太行山粉堞朱甍碧靄間瀛海北來瞻魏闕盧
龍東去控燕關農夫近夏耕初動軍士經春戍未還借問
黃金臺上客何人敷奏動龍顏

彭門懷古

九里雲龍山名
百丈呂梁洪名

鴻門宴罷更彭門
虎據龍爭跡尚存
古樹棲鴉韓信壘
帝堊衰草范增墳
九雲地峻諸山合
百呂梁深二水奔
猶有黃樓堪遠眺
擬携樽酒訪遺文

寄家訊

持節歸朝春已分
故鄉回首思紛紛
蓉山秀色撩詩句
蘭圃幽香撲酒樽
千里鴈行雲外見
五更鷄唱雨中聞
遙知骨肉團圞處
書信傳時正倚門

彭城被水泊舟子房山有感

河水東來隘呂梁
彭城無地繫舟航
城根濤浪翻秋雨
渡口津涯混夕陽
禾黍已空仍賦歛
茅茨何在半流亡
觀風無策蘇民困
坐對青山憶子房

淮陰祠

漢家三傑更誰過
一死其如史傳訛
執戟雅能辭武涉
登壇端復怨蕭何
危機委曲真王印
遺恨殷勤壯士歌
千古淮陰祠下石
夕陽誰與洗秋波

途次遇王敷英口占贈之

風雨淒淒倦客程
故人相遇若為情
百年報國丹心在
一夜憂時白髮生
別後謾勞書遠寄
燈前何惜酒頻傾
還家寄訊隆中客
暫覓城南數畝耕

宿龜山

長淮日夜赴東溟千里龜山一抹青神禹尚留跡鑿在支
祁空鎖水雲腥棹歌隱隱聞前浦漁火微微認遠汀明發
王程阻登眺數聲清磬古祠扃

中都

聖祖當年此地生擬開豐沛作神京成周再定乾坤泰象
魏常懸日月明山拱荆塗連北斗水吞淮泗注東瀛曉披
瑞藹瞻陵寢風檜猶疑雅頌聲

登第一山遊瑞巖觀留題

玻璃泉上訪仙關勝景常聞第一山高壓樓臺瞻帝里

遠飄鍾磬落入寰淮流地拱千年險樽酒天留半日間欲
起英雄詢往事磨崖惟有字斑斑

元日德州拜節書懷

菊月乘舟別帝都履端車馬尚征途山呼自信孤忠在露
宿從教兩鬢疎細數年華驚爆竹漸看春色上桃符故鄉
此日屠酥酒知費諸君幾百壺

寄輓水村

垂老南遷已斷魂更堪荒草塞孤墳鄒陽尚恐吳藩重袁
盎寧忘漢室尊千古是非勞士論百年榮辱誤君恩交遊
落落誰青眼獨向天涯酌酒樽

瀛海書事東何巡撫年兄

瀛海塵清雪未消，憑軒一望盡瓊瑤。
堤邊客騎繁長路，水上漁舟簇小橋。
千古陂塘餘種柳，百年硝鹵尚徵苗。
故人近在旬宣地，應有嘉謨達聖朝。

銅城次小泉韻

佳節來過尚閉關，詩題欣見舊登壇。
青徐驛路開千里，岱嶧山光遶四闌。
踏雪客逢杯送暖，迎風人苦袂生寒。
欲尋河決經流處，惟有鹽渠跡未漫。

徐城寄眺

降隼重瞳百戰殘，層城今許客躋攀。
烟籠大澤龍蛇蟄，塵

鎮空山虎豹閑，歌斷樓前霜月冷。
石題詩後雨苔斑，憑高日近飛雲遠。
極目長空去鳥還。

又

危欄迢遞出塵埃，遺跡蒼茫墮草萊。
放鶴客留蘇子榻，射蛇人上楚王臺。
橋橫二水雙虹落，城遶群岡百雉開。
莫更臨流羨舟楫，只今容有濟川材。

彭城阻雪

縱鶴亭前洒鶴翎，夢龍陂上長龍鱗。
背城一水縈銀帶，面郭三山展玉屏。
臺廢尚聞人出獵，樓閑空憶客揚舲。
霸橋剡曲堪乘興，凍合關河嘆梗萍。

登廣視堂東諸君子

廣視堂前霽色開江山如畫遶春臺萬家屋傍魚汀出千
里帆隨鴈陣來古廟尚存神禹跡荒墳空掩繡生才濟時
幸有諸君在莫訝憑高首重回

神女祠

巫山綽約似新粧江水縈回空斷腸花落石壇遺廟在鶴
歸郢樹故城荒更無辭客瞻雲氣猶有詩人識雨香欲向
麻姑問消息千年誰見海塵揚

感懷次韻

淵明久已賦來歸塵土吾慚未拂衣身外危幾榮更辱曾
中直道是還非故鄉酒有黃花釀遠浦帆隨白鴈飛資孝
移忠原一致敢將寸草負春暉

又

卧憶鍾儀聽楚歌省愆俄已再旬過月斜牕戶寒光薄雨
後衾裯沴氣多鴈陣忽疑鄉邑信鷄鳴時誤早朝珂平生
磊落憂民地回首江湖意若何

奉別沂樂

西風昨夜曉霜寒把袂匆匆歲又闌雙棹不知歸路遠一
樽將別故交難高門稚子應相候老圃梅花正好看吾道
行藏關世運詩筒毋惜報平安

歸舟夜坐次韻梅田

時自刑部南還下同

夜攤經史燭頻更千古行藏義自明學道非干三釜重濟
時曾拔一毫輕踈星隱樹離離見急溜迎風灑灑鳴莫道
南歸忘北闕葵花終是向陽傾

書懷次韻北山

儒生夙昔誤青袍功業無成已二毛袖手風雲雙短劍側
身江海一輕舸交遊漸覺如冰泮世故從教似爾緇笑領
清樽蕪綠綺醉吟南畝卧東臯

初歸

得歸已恨掛冠遲猶及梅花未落時騷客每懷南國頌故
人休誦北山移蒼松落落歲樵逕白鳥紛紛傍釣磯三復
常編聊隱几恍疑身世在希夷

寫興

塵外高風接笋輿亂山高下路崎嶇張羅正自門無鳥鼓
缺何須食有魚堂上墳籠供一樂庭前詩禮付三餘多栽
松竹歲吾逕不用隆中覓草廬

寫懷東熙齋并同社諸君子

解組歸來覓草堂故人應笑鬢蒼浪舊培松竹知誰健新
種芝蘭訝許長南澗濯纓歌孺子北窓高枕夢羲皇久聞
洛社多耆俊一借雲山作醉鄉

又

宦遊歷歷似垂堂僚友紛紛失老蒼
伎倆故應慚五短文章寧復羨三長
遠分風月從管道小築林泉擬替皇
一卷黃庭清書永更須何地覓仙鄉

幽居

塵外幽居愜素心一枝聊復寄雲林
鷲山高並蓉山秀龍水清連潁水深
招隱豈無人獨往問竒還有客來尋
教兒夜閉青藜閣莫遣虹光燭太陰

春遊東士灰

五雲樓上步從容何處携樽一笑同
柳染青黃春雨後山

凝紫翠晚晴中傍花子欲尋真樂學稼
吾應愧老農試向蓬瀛問消息飛霞一
線海濤東

塞上

塞上清塵晝冥然轅門刁斗夜猶傳
月明遠探雲邊戍春暖新開磧外田
鎧甲有時生蟣虱堞鏊何日出貂蟬
急呼樽酒澆飛將愧爾才名早着鞭

道卿留飲阜民門并東熙齋

春暖城頭宿雨乾阜民花柳倚危欄
鷲山秀出幾千里龍水清連第一灘
道上遊驂瞻履鳥雲間飛鳥狎杯盤
故人剩有新詩句莫惜殷勤醉裏看

麻溪別墅

閱耕亭子小溪濱門巷逶迤遠市塵當座好山清似客定
巢幽鳥熟於人卧龍水淺藏經濟抱犢雲深隔隱淪莫遣
漁郎問消息枕流吾已厭知津

春遊

澹蕩春風步鳥輕沿村花柳愜新晴畫圖一似好山色絃
管不如啼鳥聲茗椀蔬盤供散誕竹籬茅舍貯昇平舞雩
樂在忘言外袂袂何須詠濯纓

卜居

城市常疑有是非故應空谷掩柴扉睡醒一鳥花間語坐
看孤雲雨外歸採藥客嫌松逕遠蒸藜人喜稻田肥不須
青史徵前事濡尾爭如杜德機

謾興

藜閣先生髮已華浪憑書卷作生涯人爲一介不容苟天
性萬鍾何所加歲遣家僮多種秫時邀隣叟共看花蓬萊
絕頂人誰到小隱蓉山也自佳

耕隱

賃得烏犍此結茅墾荒時復過山坳草堂水漫蛙成部花
逕泥融燕得巢白水真人從羽化青州從事付神交鄰翁
抱甕時相訊不用清時賦解朝

東華舊館題壁

華壇重訪思依依尚憶携書此振衣雕砌碑橫蝸篆集畫
梁泥落燕巢稀丹青有路仙遊遠滄海無塵世態移慚愧
東寮供酒意幾時阿閣鳳來歸

雨中乏米對酒解嘲

宿雨晨炊藉石田隔窓鵝雁各喧然周人未覺甔將罄墨
子渾忘突可烟簞食樂非吾道外壺飧憂在此民先西江
涸轍何須問聊復豪吟付醉眠

穀日

新歲嘉辰次第過雨中春意恐嗟咤雲開新月已如許節
去清歡能幾何椒釀未空須酌酊梅粧猶在待吟哦少年
爾辨尋芳樂吾老尋芳興更多

五雲樓邀二林通府

五雲樓檻倚晴空暇日携觴欵二公章貢江聲絃管外芙
蓉山色畫圖中十年契闊占星聚千里咨詢擬歲豐能賦
登高慚潦倒凌雲歌罷見飛鴻

寫懷勉諸幼

落拓清時作遠遊蕭疎白髮已盈頭圍棋謾想商山樂倚
柱能忘漆室憂畎畝有炊供一飯江湖無碇繫扁舟諸郎
未省伊顏事更向青雲覓舊樓

折梅

山逕香隨杖鳥回膽瓶對臘凍猶開芳心不逐爐熏散清
夢還隨月影來湖上重尋應有恨隴頭相寄謾多才憑君
莫話調羹事且共吟窓對酒杯

畫梅

綽約冬前萬斛春華光凝思恐難真移來洗硯池邊樹幻
出羅浮夢裏人玉杵搗霜供換骨綺窓留月爲傳神素屏
一幅懸高興掃盡熙荃筆底塵

癸巳新正試筆

桃帖重題歲又新依然門巷對雲岑齊家要在脩身處報
國常懷教子心殮菊故應無餒色佩蘭容亦有知音靜中
獨抱先天易觀象研幾恐未深

元宵

上元獨坐憂春雨群從相過愜晚晴携酒莫辭深夜醉張
燈又是隔年明金猊香噴重簾暖玉麈塵揮四座清簫鼓
滿街人共樂聊將詩句答昇平

書樓寄興

書樓疑在畫圖間高下亭臺遠近山文廟數行松樹古仙
潭一片白雲閑簔衣箬笠自耕牧竹杖芒鞋時往還欲問
渭川莘野客高風可許後人攀

西隱卷爲朝弟賦

芙蓉山下結幽居水竹亭臺盡不如半榻清風供嘯傲一
犁甘雨付菑畚輞川樂在春遊裏杜曲詩成午夢餘聞道
綵衣歌舞罷密潭新釀醉芳腴

送德鄉姪三水司訓

明時郡邑開三水故國山川著五雲宦業駸駸期接武儒
風濟濟喜同文九霄奎壁清秋見百里絃歌靜夜聞師道
由來關治化勉旃濂洛繼餘芬

輓十妹

清姿淑行比班昭毀璧那堪賦短騷白兔藥成虛月殿青
鸞書去渺雲濤眼枯恨洒慈親淚腸斷愁聞孺子號回首
桂山埋玉地鏡臺空鎖月輪高

送紹卿姪樂昌司訓

清時持鐸稱儒門官路梅花共爾論韶嶺樂猶遺跡在龍
溪詩祗舊名存青衿濟濟時方泰黃卷雍雍道可尊老我
育英真樂地勉旃高誼繼前聞

宴外舅西軒

乘龍幾度此登龍勝日高堂燕喜同萱砌伸榮穿瑞雪桂
庭分秀倚春風飛觴令急愁先醉落筆詩成恐未工莫向
潁川誇勝事德星今聚五雲中

題尚卿姪別墅

五雲郭外寄行窩翁季同遊樂更多花外風巒開戶牖樽
前魚鳥聽笙歌豐年自信留畚在清世其如隱逸何小阮
情深吾已醉擬携書卷養天和

慈生孫

克問佳氣曉葱葱堂上欣聞叶夢熊松桂故應常有子
榆寧患不為公玉犀磊落聊相戲湯餅逡巡豈待豐瓊重
傳家書萬卷聖功原自養童蒙

九日值雨飲棗弟南樓

佳節衝泥客倦從南樓聊復一樽同菊花不負陶潛約竹

葉真如杜甫工江上數峯迎晚翠雲端一鴈下秋風憑高
愈覺雙眸迥廊廟間闊思萬重

約遊東華

擬向東華訪舊遊故人能共一樽否窓懸碧落山常在門
倚孤松水自流跨鶴詩新堪獨賞換鵝書舊定誰收丁寧
莫惜青藜杖要看虹光射斗牛

春卿姪席間口號同淇園弟

元方曾此揖青袍甲第重新喜俊髦龍水遠輸芹泮綠鳳
山深拱杏壇高衣冠堂上詩情洽謔吹庭前酒興豪更約
明年攀桂日月輪同捧出雲臯

飲食卿姪東華別墅

三醉東華別墅間
樽前高興未能還
望窮繞郭千尋樹
踏遍沿溪十里山
冠帶影翻魚撥刺
笙歌聲和鳥間關
朗吟杜子登高句
千古英風尚可攀

執齋先生文集卷六

執齋先生文集卷七

五言絕句

言志

丈夫志有爲四海不盈掬
豈有千里駒而戀一升粟

車

車輪動不括夷險各適宜
君看輪中軸百折終不移

舟

凌風十幅帆壓浪千尋柁
舟中人安眠只訝山飛過

感物

鷄啄階前蟻微生亦可憐
爾猶恣口腹吾欲廢烹煎

夜月

對月悲良夜含情不見君
簫聲何處所縹緲隔行雲

送人

君向長安去長安幾日還
故園春色好莫遣杏花殘

題畫

巖石有太古林花無四時
寧知栖隱客不是帝王師

又

山碧秋雲瘦林紅夕照明
溪流將綠綺寫作讀書聲

梁園

擬向梁園醉梁園迹已陳
空餘桃李逕無復綺羅人

赴召南道中遇雨

舟行不避風車行不避雨
兒女不出門丈夫心自許

又

水行不怕蛟山行不怕虎
世路多險巇志士心獨苦

子聲賞花次孔教韻同克謹長官

花圃得春深久開猶未落
上有翠盤露和香供晚酌

又

圓荷出水逢紅藥
迎風早停杯君試聽
莫遣鶯聲老

剡溪

積雪滿空山夜靜溪流響
幽人未啓門扁舟自來往

長安

君若問長安長安從此去江湖風浪多莫向花間住

又

莫道長安遠長安跬步前君看沙漠鴈來去自年年

閨情

夜雨窓前約春風江上船緘書腸欲斷何處酒家眠

旅興

泛泛同鄉客潯陽暫泊船月明沽酒盡相對不能眠

憶諸弟

一別十年餘經春未得書夢多無定狂肥瘦近何如

灘

灘平石隱隱水落石差差莫言灘石險最險是平時

和銅雀妓

一自分香後誰曾賣復來西陵春又盡飛李幾時開

秋怨

郎似花間月儂如葉上霜月移高樹去霜落舊根傷

口占贈遷戍者

松栢難培植茅茨苦蔓延未論霜雪後人意自憎憐

二

偶爾三秋繫悠然萬里行君看天上月一歲幾虧盈

三

莫向荊源住荊源路已通不如蓬島上來往一帆風

四

自有琅玕實何因雁網羅陽鳥出海底先照碧梧桐

江行聞鶻

九江流不盡中有巴山雨何處吊湘君空林聞杜宇

題畫

樓觀參差起烟霞縹緲間不知天地外何處此江山

飯穎山解朝

玩世仍驚俗憂時更索居君才建安上吾道國風餘

逋仙

盡道孤山好梅花得此翁羅浮千萬樹清詠許誰同

卽事

紫極塵如霧銀潢浪似山祇聞驅馬去不見棹舟還

嘗醋啣

染指各攢眉搔手不容口寧知調鼎人鼻吸至三斗

三笑圖

義府深叵測士龍淺難忍莫更虎溪狂萬事且微哂

憶懷

短短秧初綠踈踈麥未黃如何春後雨只是在垂楊

雪菊

是歲十月十一日盛雪菊花甚佳

久訝凌霜瘦俄驚帶雪肥黃葩兼紫艷一白是還非

春懷

昨夜東風急塵多曉起遲呼童問桃李吹折最高枝

素扇

素魄騰滄海微薰盪碧空期君清暑殿解愠萬方同

閨懷

粧罷慵收鏡煩君更畫眉只愁重會日不似別君時

四景

春耕莘野雨夏釣渭濱風秋牧華山草冬樵秦嶽松

四喜

唐虞逢盛世孔孟得真傳二老無虞日群生大有年

梁楚遊

秋雨鷄聲月春濤馬足塵那知行路客不是故鄉人

四香

梅蘭蓮菊

庾嶺孤根在寒深雪更培春風不相識忽自送香來

又

空谷深如許幽葩也自敷不知桃李逕曾有此香無

又

麗質原無染亭亭鑑綠漪風清香更遠惟有道人知

又

粲粲東籬下霜餘色更妍淵明香滿把留取釀清泉

省愆

縲紲非其罪干戈省厥躬下車勞 聖主辭醴愧諸公

線香筆

此類非中山龍涎來海外落紙散雲煙猶有餘香在

片瓦硯

舊質墮鴛鴦新眼穿鴈鴒何慙未央宮貯墨有餘綠

繩衣架

掛繩兩楹間離地三尺許未誇一木支能使衆衣舉

磚香爐

龍巖竅其中炷熏薦清楚香霧曉網縕未羨博山古

離思

投棗終成怒殘桃始見憐鸞膠那可續別鶴自無絃

又

隕石終難起頽波可暫留采蓮溪上柳空繫木蘭舟

雜題

旅泊雲山下江流接海濱不辭風更雨恐阻問津人

又

書屋藏春樹扁舟倚夕曛那知江上水不是洞中雲

夜坐

夜坐關千慮何人夢獨醒隔窓疑有雨風閃讀書燈

秋意

窓下琴書靜鈎簾玩月華坐久爐薰歇微風動桂花

二

問訊東籬菊秋深幾度開獨橫青眼望不見白衣來

三

水落漁汀出溪清釣石高秋風知此興日日薦霜螯

四

蟋蟀聞秋雨更闌語不休綈袍猶未辦何日獻功裘

登樓

章貢天邊去群山曉霧開如何樓上望只見鳳凰臺

團扇

團扇引風涼涼風妬團扇莫嫌長信宮終勝昭陽殿

結廬

結廬泰山阿寄目雲林杪秋風落葉深古道人行少

晚憇柳堤有懷

垂楊夾古隄蟬聲亂如雨雲開見方山懷人久凝佇

六言

花

春半春前春後花紅花白花黃半吐半開半落堪憐堪賞
堪傷

題扇

明月飛來掌握清風透入襟懷殘暑笑驅酷吏微涼歌阜
民財

匡廬

西北幾層烟樹東南一片雲濤只道九江地迥不知五老
天高

觀書偶作

中立案前兩肘子韶窓下雙趺但使此心澄澈不妨老眼

糝糊

七言絕句

贈道士

黃鶴仙人白兔翁紫髯蒼鬢碧方瞳孤雲片月閒來往家
在蓬萊第幾峰

見月有懷卓兄選兄

登高望遠惜離群日盡天涯不見雲解事獨憐今夜月與
君千里共金樽

又

裊裊秋風入帳紗疑君今夜夢還家起來踏遍堦前月一

片清霜浸菊花

採蓮曲

江上相逢並綵舟
滄浪歌罷更夷猶
明朝何處來相訪
家在蓮塘阿那頭

楊柳詞

江頭楊柳謾紛紛
不與離人綰斷魂
願作浮萍流水去
東西南北正隨君

又

晴腰裊娜露眉濃
拂檻遮簷思萬重
縱使君前攀折盡
也勝零落向秋風

送奎弟

白雲西望楚天長
况復秋風送鴈行
年少未經離別苦
不知斷盡老兄腸

又

仕路隨親二十年
寸心壅滯尚依然
但期諸弟承清白
不要鄰家負郭田

竹枝詞

十二珠簾拂地垂
綺窓終日不曾窺
梅花欲報春消息
時遣風來座上吹

二

執齋集卷七
九
娟娟明月鏡臺前
藹藹晴雲綉閣邊
雲比儂衣雲易散
月如儂貌月難圓

三

雙親愛女重如玳
奴愛奴身重似親
閉月幽窗圍翠幄
凌波新襪避芳塵

四

南山日日鷓鴣飛
北山夜夜杜鵑啼
藉似鷓鴣飛不去
杜鵑啼殺幾時歸

五

女奴遙指虎丘山
樓閣層層紫翠間
擬與真娘薦芳芷
却

愁無處避遊騷

六

山色青青拂翠蛾
湖光瀲灩染春羅
可憐年少誰家女
却棹輕舟採芰荷

七

新買樓船繫水濱
船頭日日賽龍神
阿哥要渡錢塘去
怕說風濤愁殺人

八

錢塘潮上雪山傾
伍相千年恨未平
莫向五湖誇倩麗
西施一點洗難清

題友人四圖

春夢覺來聞急雨惜花心性苦煎熬起來倚遍闌干曲到
得梳粧日已高

二

月明如晝映前墀坐久寒生禁漏遲肯向黃姑問清淺此
心惟有素娥知

三

玉盤迎月注清泉粧鏡無塵影倒懸素手掬來光不定似
將圓處又難圓

四

春來常日玩芳菲勾引餘香滿袖歸蜂蝶誤疑花是貌鏡
中猶自傍人飛

春遊

竹裏桃花分外紅匆匆一見幾春風遊人爲想題詩處每
過橋西信玉驄

孔明

八陣堂堂佐渭濱將才千古更無倫若教巾幗含羞死誰
作他年滅魏人

吳隱之

貪泉千古變廉泉洗滌如公自可賢何事番禺三日火竟

無一滴到閭閻

秦檜

偃月堂深宋社墟中原無地泣包胥施全計出胡銓上却恨當時劍術疎

又

十二金牌走電光長城自壞獨鏤鄉女真飲至論功日秦

檜宜封兩國王

檜嘗封兩國公不受蓋有所憚也

楊妃

錦祿宮中戲太真祿兒真比壽王親溫泉流盡宮前水不洗當時一點塵

廣成

一訪崆峒世晏然空山遺迹尚千年後來幾度勞清問不是談空是說玄

朱買臣

山婦寧知太守賢樵蘇聊復理殘編下帷若似江都相莊助如何得比肩

書感

桑棗林中河水流兩三家住一荒洲春來牟麥飄零盡殘喘何因度九秋

又

荒盡田園去住輕不知何處可逃生書生未辦青州粟忍
向船頭聽哭聲

志恨

廿年揮淚遍天涯幾口相親十木麻謾說神仙堪度世不
知地下却成家

次白沙寄仁興韻

吾道風前寄一燈幾人愚魯似顏曾泰山頂絕乾坤小莫
落諸峰第二層

二

曉案迎曦夜榻燈祇將溫飽覓王曾要隨白石齋中老千

仞危梯更一層

三

佛氏今傳無盡燈孔門千古幾玄曾不知方寸關齊治咫
尺雲山萬萬層

看一峰詩口占

莫欺瘦骨小巉巖炯炯雙眸四海間得失近來渾忘却一
壺春酒醉希顏

見梅子

風日甘甜梅子青小園常日醉還醒傍人欲問調羹事樹
底黃鸝喚不應

早秋

砧杵誰家理故裘西風涼冷獨知秋南樓倚遍闌干外一片月明如水流

早朝

城頭楊柳尚棲鴉瘦馬來趨玉殿衙明月滿街霜似雪只疑清影是梅花

銅雀臺

臺前猶是漢山河臺上仍非晉綺羅金雀不歸遺事在殘碑爭柰汗青多

汴都

黃河曾透汴西東新柳成行舊堞空三百年來經幾戰兒童猶唱宋仁宗

堆金塚

牧野當年恨倒戈堆金新塚更嵯峨鄴都道士憑誰問胡鬼曾如漢鬼多

邯鄲

夢中說夢轉生疑仙外求仙亦太癡借問邯鄲道中客青驢適意幾人知

務農

驄馬原非索負租柴門緣底費傳呼野人不是趨迎慢蚕

老麥黃苗正鋤

夜題三鳳泉

荒村歷盡抵僧房三鳳泉頭笋飯香只恐天明驅馬去夜
篝燈火聽淋浪

黑鹿山祈雨

石磴攀緣草樹中碧潭幽廟倚危峰我來應被山靈笑霖
雨何時起臥龍

城南觀雨

風翻庭樹聲初歇雲擁遙山勢欲飛好雨一犁看不厭野
人門外粟苗肥

曉雨自中湖至平羅小憇

草樹蒙茸麥逕微鄉民曾識使君稀朝來幾點西山雨應
恐輕塵送馬蹄

喜雨

秋旱四郊猶赤土晚炊何處更清烟夢中忽聽淋淋雨疑
是簫韶奏九天

偶興

驪珠一顆波心月碧玉千尋雨後山樓子數層書一卷無
人知我道心閑

賞雨

魯公謾說觀雲物，庾老徒知玩月華。何似共城來賞雨，一犁春滿萬人家。

春思

桃李風前又一春，紛紛車馬隔紅塵。獨憐今日看花伴，不是當年種樹人。

夜坐

銀河耿耿夜漫漫，瀉作銅壺漏不乾。遙憶共城明月下，有人翹首望長安。

衛郡歸作

嘗厭塵埃撲馬鞍，此行風雪不知寒。太行玉立青霄上，洗

出平生鐵肺肝。

志兒啜粥小婢撥榆為蔬戲作

傲吏寧辭室磬懸，齋厨新火煮清泉。春來榆樹沿城綠，一日何妨食萬錢。

乞米

自笑無能樂有餘，近來停俸為征輸。午窓志子誇能事，臨德顏公乞米書。

和白沙先生炒蜆韻

黃雲不雲山曉晴，白沙無雨暮江清。炒蜆江門對高弟，可無餘滴到蒼生。

北行乏資貸於石二尹書此爲質

稱貸爲裝自嘆予俸資君亦豈贏餘多慚鮑叔分金意聊
質顏公乞米書

風雪趨衛郡

昨夜黑風吹倒山雪花一尺馬啼間丈夫報國心無已擬
擺銀鞍度玉關

共城八景留別席間作

方山回望翠屏新幾歲城中作主人今日蘇門一樽酒方
山爲主我爲賓

原水珠躍

百泉流水萬珠璣一顆珠璣勸一卮此水莫嫌流去遠直
將群水會京師

晉祠耕耘

晉祠一水流碧玉衛田千頃熟黃金我行更祝祠前水常
與蒼生作傳霖

雲門舟楫

雲門南下萬舟航南北東西萬里長猶有孤蓬繫林樾天
風同看曉帆張

東山縱牧

東山縱牧

東山日上草如烟幾處牛羊趁草眠如此牛羊如此地不知誰比距心賢

西嶂歸樵

斫月挑雲下碧空曉來新桂滿城中停車試問腰斤客恐有奇材臥遠峯

邵窩清風

傳得羲皇未畫圖清風千古此山隅微言却許魚樵對還許共城舊令無

共臺峻節

共姜臺上三秋月照見共姜千古心我向臺前理行棹月

明又照百泉深

別輝東諸同寅

扁舟乘醉下雲門忘却玉村又李屯日暮方山雲外立不勝惆悵憶諸君

乙丑除夜寓恒山憲臺

元日叨隨奉引班奉天咫尺對龍顏不堪此夜思前事便似貞觀慶曆間

丙寅十月寫懷

時奄瑾用事

木脫山空水不流荒郊斜日倚危樓憑將賈傅縱橫淚一洗胷中萬斛愁

夢中題梅

孤根自與陽和得雅操更於霜雪宜一任高樓吹鉄笛此
香原不受風欺

歸興

道上東風吹柳花扁舟歸客興無涯開樽取醉掀蓬坐閑
看清江浣白沙

晚泊

江樹侵雲水沒沙短籬茅屋兩三家歸舟晚繫黃泥峽看
盡風帆出浪花

春興

連日春陰泥落花新晴聊復問隣家兒童走報溪添水楊
柳堤邊失釣沙

戲題濯足圖是夕被逮

楊柳堤邊溪水清濯纓歌罷太狂生脚根自昔無塵浣牛
口先生莫浪驚

用韻戲答耳鳴

嶽中作

羊腸世路幾崔嵬軛轆車聲午夢回自是塵根消不盡耳
中何處有春雷

嶽中偶書

小步庭堦惜徑苔晚來微雨洗浮埃平生最愛芝蘭好誰

遣春香入禁來

獄中次韻任廷贊時祭有感

野蕨抽拳笋脫胎歸心聊付望鄉臺
可憐俎豆庭前月空照千山杜宇哀

次韻留別諸君

時建放還

雲搖屋角松聲急月掛庭心鶴夢閑
聽珮知君定回首短藜吾已度千山

次韻酬地官忠

春雨多情碎落花香泥狼藉燕成家
故山松老未歸去流水爭如客思賒

被寇書感

亂後江山花劫塵故園花柳不成春
親朋半在形容瘦相見渾如隔世人

題畫留別

樹杪闌干曉幔青江心風浪夜龍醒
故人獨立蒼茫外目送飛帆過落星

起廢題畫

步出青山杖屨遙白雲回首寄丹霄
須知二老歸周路不比尋常駟馬橋

大梁城

大梁城上四無山
渺渺嵩行百里間
宋殿梁臺何處在
黃河流盡鳥飛還

信陵君

信陵遺迹汴城濱
驄馬求才愧後塵
試問夷門抱關者
只今屠犬是何人

宿瓜步有懷

鴈聲南斷惜離群
酒醒蓬窗月半痕
渺渺江湖重回首
夷人何處賦停雲

來暘亭在甯城東

鳥石山前着小亭
東郊初日洗滄溟
尚嫌龍帶雲歸臥
分

却壺山一半青

執齋先生文集卷七

